

002 太上洞淵神呪經

(敦煌本)

經名：太上洞淵神呪經（敦煌本）。撰人不詳。十卷。底本出處：伯三二三三、伯二九五九、伯四六七六、斯三三八九、伯二七五二、伯二八九四、斯九三〇、伯二四四四、伯二三六五、伯二七九三、伯二七四九、伯三三〇九、伯二三六六。

洞淵神呪經誓魔篇品第一

道言：吾昔在三天上，爲諸天女說無量經，教化一切。時有下方世界真人慰明羅，將諸人衆卅九萬人，到于三天上，聽說無量大經，內外安隱。說經下坐明羅等，悉更起三礼太上，問訊：天尊教化，難于弟子等，傴僂以展

下情。太上曰：子從炎明地來？明羅

一切驗焉。

曰：然。太上曰：中國之人，頗有尊經奉師學仙者不？明羅曰：中國人惡，不信道法。今但聞爽屍之音，不聞有仙歌之響。人民垢濁，三洞壅塞。百六之灾，刀兵疾病。魔王從毒，煞害良善。門門凶衰，哀聲相尋。衆生相殘，國主剋暴。自作苦業，相携而死。懷愚受魔，了不知出。此等之人，將何度之？太上聞明羅等說此已，乃流淚哀愍，告諸天人曰：衆生可念，不知道法，不自求度，自共作惡，更相誹謗，三洞流布，不知奉持。亦如盲人遊于日月，日月豈不明，盲人不睹。主師宣化，愚者不悟。

太上將天人玉女八十億萬人，來下救之，過于王京山。山上有一桃樹，樹高三百九十万億里。東枝覆東方，南枝盖南方，西枝蔭西方，北枝蔭北國。卅九億万年一花，八十億万年一結子。子熟大如車輪，人食之，三千年不饑。鬼見此桃枝葉，以示鬼，鬼則死矣。天人各各持此桃木以下，煞疫鬼，

道言：自辛巳、壬午年已，中國鬼兵從逸，魔王暴行，毒瘡生民。我今遣卅九億禁官，攝卅六天魔王，魔王來下共誓誓：自今以去，若中國人有枉死、急病、刑獄、囚徒，悉是魔王，魔王不攝下人，使賊害種民。自今以始，太上金口所勅，若有不禁，令中國之人，遭其疫病、刀兵、困苦、刑獄、囚徒、死亡，不已理者，斯是魔王先坐不禁下人。故太上乃遣十方主者卅九萬人，天女、大梵王三千万人，布行四方。召卅六天一切魔王及小王八十億王等，妻子眷屬，悉共要誓。玄女、魔姑、玉妃、天女三千六万人，悉共同來，在太上前勅魔王。魔王悉伏，各各同遣魔王力士巡行國界，維護中國。中國之人，恐太上誅之，九天梵子及天人、魔王王乃夫人嫫女悉三禮，奉太上之教。

道言：自伏羲以來，至于漢末，人民大樂，多不信道，悉受天氣自然邪魔，不知有道，不知有仙，直知自然邪。天時時有信道，不知大晉之世，世欲未

時，宋人多有好道心，奉承四方，吾先化胡。□□人習仙道者，中國流行。還及劉氏苗胤生起，統領天下。天下人民，先有多苦。上撓下急，然後轉盛。盛在江左，天人合集，道氣興焉。天運劫近，其中往往有值三寶道化、大驅無量上清、黃庭記仙、太素靈寶三昧者。此人等皆先世大福，福流後身，聞見此經，得度三河洪災之厄。善哉，善哉。子等男女之人，若國王、帝主、方伯、二千石，下至愚人，不問男女奴婢，能及此經，受其契錄，名入仙品，受經衆不枉死。太上在玄景之宮，說此神祝，九天天魔王、男女羅刹鬼賊、諸天魔曹眷屬八億萬人，悉集在坐，聽天尊說法，各各斂手，一心伏地，伏地諦聽。天尊乃并爲演說其記仙、大驅、貞經四種，一切聞之，無不身上覺異。

道言：汝等諦聽吾言，今爲汝等說來世劫盡時之運。自伏羲三千年，大水洪溢，人民半死。死已卅六年，万姓返亂，自共相煞。至周秦之滅，人民復死。及漢魏末時，人民流移，其死亦

半。乃至劉氏五世子孫，係統先基。爾時，四方敷敷，危治天下。中國人民悉不安居，爲六夷驅逼，逃竄江左。劉氏隱跡，避地淮海。至甲午之年，劉氏還住中國，長安開霸，秦川大樂，六夷賓伏，悉居山藪，不在中川，道法盛矣。木子弓口，當復起焉。

道言：大劫欲至，治王不整，人民吁嗟。風雨不時，五穀不熟，民生惡心，及亂叛逆。父子兄弟，更相圖謀，以致滅國。怨賊流行，煞害无辜。當此之世，疫氣衆多，天下行九萬種病，病煞惡人。遣赤頭煞鬼鬼王，身長万丈，領卅六萬億煞鬼。鬼各持赤棒，遊歷世間，專行取生人，日日夜夜。青炁者卒死，赤炁者腫病，黃炁者下利，白炁者霍亂，黑炁者官事。此鬼等持此炁布行天下，煞其愚人。唯有道士法師，受神祝經，有九十億萬大神、自然力士、天人玉女，悉侍此經。若有奉持供養者，万病自消，終不橫死。及鄰國有大賊，讀此經者，賊自去矣。坐中男女，聞太上說此經，各各驚喜，悉起三

礼，弟子等願受此經。

道言：運急垂至，人民多惡，其中有信道奉經者，悉是天人，非世間愚人矣。大聖見世間愚人矣。大聖見世濁亂，遣天人來下生于中國，助時教化。天子、大臣、公王、令長、兵吏之中，雖處卑賤，一心信道，聞經信用，仙人導之。若聞見三寶，不欲受持，將知此人從六畜中來，與經無緣。是以大水之灾，魚鱉所食，與泥同流，万劫不出。

道言：自今以去，若男若女，聞見此經，及有受者，不問男女、奴婢、公私之人，有受寫治經卷供養，生生有利，士宦日遷，疾病除愈，万願從心。若今有持此經之人，三大大魔、九大大魔、卅六世之邪、十方煞神、領鬼大王卅八万人，各各自整汝等下人，未令枉害受此神祝之人。若今世間有男女之人，有厄急之者，此法師持經到家救者，汝等鬼王收汝小鬼一切，未令犯此主人，當爲和喻中外之神，家親殍疾，分別解絕，使令病人得差。不如吾言，汝鬼王等聽吾呪之焉。病人得差，官事解散，

卅六万神守護病人。若不如吾言，汝鬼王等聽吾呪之焉。

道言：自今以去，若世間人有疾病、官事、刑獄、困苦轉此經，家不蒙其福祐，是汝等鬼王之過耳。何以故？小鬼不信大法，縱暴兇心，汝等聽之。東來神，西來神，南來神，北來神，神各三億万人從。若鬼王不承吾告下，縱放下人來犯受經之人及法師所救之身及其一門，故令遭毒。斬此鬼等，令作万分，吾恕之。急急如律令。

道言：三天大邪王，領卅八万人，專行赤腫。六天大邪王八十万人，領七百万人，專行白腫。九天大邪王六十万人，將從三万九千人，專行黑腫。卅六天大邪王，領七十万人，專行黃腫。七天上大邪王，領九億万人，專行青腫。緣人身體，流溢四支，面目青黃赤白黑，乍來乍去，日日沉困，炁來創心，心下堅實，不用飲食，食便轉少妨遲，食無炁味。或先世囑咀考來逮人，如此罪緣，仍有官事、刑獄、過咎，當欲消者，先受此經，供養奉師。汝等如

此，後亦昇仙。

道言：汝等大邪王，汝等先世无福，不信大道，作罪山積，令在邪中專行瘡病，苦毒万姓。或有身體寒熱，返目白黑，狂走妄語，歌喚哭泣，四支臃腫，忽忽惛炁。如此之病，流滿天下，迷或人心，令其遭事，枉入刑獄，荼割万人，悉汝等邪王爲之。自今以去，奉佩此經契者，汝等助護之，未令有惡。若轉此經之家，鬼兵遠之，善神祐護。若不信大法，故復來犯。汝等邪王入淵，汝邪王入水，汝邪王入火，汝邪王入萬斬，汝邪王頭破八十分，急攝汝靈，不得枉濫太上良民。急急如律令。

道言：大劫欲至，疫鬼流行。汝等道士，勸化愚人，令聞此經，令受此契。受者，大水將來，九龍迎之，終不有危。三灾垂及，三灾者，水火兵刀，切汝等身，汝等不知，不能得受餘經，餘經不要。此二卷經煞一切邪，魔不敢近人。但受此經，家中供養，不用宅錄。何以故？此經有無量仙人、玉女、天人，龍鬼常守護此經。有人久病，多

凶少吉者，衆事不利者，亦可奉持此經。此經能消一切大病，受持行者万事吉善。魔王及邪王、世間鬼王等，聞太上說神祝，心中惻然，咸曰：我等自昔以來，專行惡事，與道有反。今日聞天尊說此語，當奉行之。若世人有受此經者，亦自追尋護之。若有小小世間鬼賊，欲來侵欺此道士者，我等當誅之。自今以去，若有人疾病、官事，轉此經，我等亦當助之爲福。若不存誓故來犯者，頭破万分，不足以謝。

道言：大劫將至，水流中國，天下蕩蕩，人民死盡。唯有道士，受經之人，九龍來迎。天人百億，選擇善惡，汝等信之。若有久病，先考所加，當受此經者。有官事、刑獄仍常者，當受此經。若有邪枉，口舌万端，亦受此經。一切不宜，亦受此經。若受此經者，魔邪不敢悞人。

道言：五濁之世，生官僥倖，不矜下人。下人吁嗟，万民懷叛，天下悠悠。日月失度，五穀不成，人多死亡，大水比起。有知之人，見經急受，書其

經卷，竹箱筒籠，高座莊之。若不尔者，亦可五色囊盛之，有病轉之，鬼兵自散，官事亦了。受此經者，一家一人受之，辟一門。縱使目不識字，但受雇人寫之，靜室供養，邪鬼自伏，一切不敢近人。

道言：自今以去，轉此經家，若有病人、官事、口舌、宅廬不安，若聞此經誠，勅魔神祝，若一鬼不去，妄稱大神、山林社祀、世間廟主、壞軍死將、脫籍之鬼，來助邪王，病痛世間人，不從大法者，十方煞神收而誅之，未令得脫。若復故來縱暴、專行若毒者，鬼兵等斬之，魔王等身作万分，不得恕之。急急如律令。

道言：世俗人惡，信法者少，大水來近，恐汝等沉溺死亡者衆，不知出期，吾念甚哀。故玄景之官，九合之室，爲將來一切衆生，開其槁樑。示之以道，導之以法。令免三灾九厄之中，去離八難，生天人中，昇仙之緣。勅下魔王，令安万姓。預爲呪之，禁逝惡心。自今以去，有受持此經及轉經之

家，一切不犯。後世男女，若受經奉師者，昇仙不久。

道言：五世之孫劉子王治天下，其後大漢人民多有值三寶者。何以故？此世世急，人思道心，山林隱士不可稱數，見大劫欲盡，受經者十有七八。三灾垂及，汝等道士有緣之者，乃能信之耳。太上爲一切衆生故，涕淚哀愍。汝等信吾言者，九龍之輦來迎子身。若不信者，盟津三河，汝等看之。坐中男女三億万人，悉求受此經。

道言：汝等受此經十卷供養之，行來將之緣身，万病自差，仕官高遷，所願從心，亦可見當來真君，真君不遠。甲申灾起，大亂天下。天下蕩除，更立天地，真君乃出。既來聖賢仙人及受經文之者，一切來助左右，東西南北道士爲佐，無有愚人。汝等世人，但受此經，自然見真君。

道言：真君者，木子弓口王治，天地大樂，一種九收，人更益壽，壽三千歲。乃後更易，天地平整，日月光明，明於常時。純有先世、今世受經之人，

來輔真君。是以智人道士，誘化愚人，令受此經。此經消一切病，鬼賊伏散，万願自果，所向合矣。若此經行之處，魔王助化，終不令人有惡。

道言：男女道士有骨應仙者，得值此經。有相應見真君者，得受此經。此經有神，令人心開。真君出世，无爲而治，無有刀兵刑獄之苦。聖王治化，人民豐樂，不貪財錢。无有雞豚犬鼠牛馬六畜，鳳皇爲家雞，麒麟師子爲家畜。純以道法爲事，道士爲大臣，男女貞潔，无有淫心。人民大樂，故是今之道士耳。真君出人間，不覺自易，其形端政，无比長大。人長一丈三尺，真君長一丈六尺，面目平澤，人中无有，姿首了了，視之无厭足矣。坐中男女大衆，聞太上說真君，其國大樂，各心中懽懽，因俱起稽首三礼，弟子等亦當奉持如此經。

吾左腎爲日，在吾左腎，當吾左壽，出吾左腋，初出如鷄子，後出如日，居吾左目。吾右腎爲月，在吾右腎，當吾右壽，出吾右腋，初出如鷄子，後出

如月，居在吾右目。

右卧及覆依三五呪法。

都畢呪曰：吾今暮宿靜堂之中，三五家家冥冥，左日右月，以爲光明。廿八宿繞吾身形，璇璣玉衡藏吾身中。五神不出，魂魄安寧。七星宿衛，北斗除殃，万神伏諾，敢有當者，斬煞汝形。一切執伏，勿當魁罡。叱叱叱叱。

吾君乘自然之車，駕无極之馬，要帶漫延之劍，震天動地，在吾心下。

吾欲出行之時，身衣三五，足躡北斗。日月在吾前，五星在吾後，千乘万騎，俠吾左右。震天動地，誰敢當者。山精水密，猛狩毒蟲，一切執伏，勿當魁罡。叱叱叱叱。

洞淵神呪經誓魔品第一

洞淵神呪經卷第二

……中玄經……大神通，智識章句。民子八万，真人俱夾，稽首三礼而白天尊曰：中國人惡，不信至言。今有三洞經出，不知受之。疫鬼刀兵，煞害衆生。衆生死盡，故不來出。弟子等常□見之苦，痛不忍聞之。彼國今日政有行尸之人，无道德之君。君臣相殘，父子相刑。道士行道，愚人競笑。自牽入惡，不務仙品。大劫垂至，亦不知之。疫厲惡炁，煞人略盡。弟子等不忍聞見，來告太上也。

太上仰天長嘆，流淚五行：悲哉衆生，不解大趣。今當遣天丁力士八億万人，天鄒直騎八億万人，天煞大兵卅万人，天禁大吏卅万人，天逢守士卅万人，爲中國人遣此等疫鬼耳。汝等持此神呪經，布行中國。中國有受經者，疫鬼自去矣。

道言：自庚辰、辛巳、壬午、癸未年近甲申，天下九十二種病，病煞惡

人。自非有德人、道士□免，□下切切。鼻口喉塞，嚙咳腹滿，炁上刺心。手足拘急，胸背徹燠，耳又不聰。黃疸臃腫，身體黑赤，五種□腹，利有霍亂，吐血鼻肉。百支破痛，節節枯落。炁熱驚走，悲思惚惚，雲中白眼，四支及覆。口語无端，妄見神鬼，□腫下□，手足不全，身死失姓。如此之徒，悉怨皆疫鬼來煞之惡人耳。汝等有奉三洞之人，吾三天力士大神，取此鬼不遠子等也。水來不久，化人受經法。受此道乎，得免三灾，吾不虛言。

道言：自今以去，若有道士，心貪仙道，不求世榮，一切奉法，志在三洞，逐師入山，人聞教化。如此之人，吾當遣天丁力士卅九億万人隨行，覆護所行之地，万鬼不當。告魔王等，自今以去，勤爲衆生遣一切疫鬼焉。

道言：甲申垂至，水來不久，今有疫鬼煞人。中國多惡，惡人聚生，不識真言。三洞久布，不辭求受，自招苦愆。奈何奈何，衆生可愆。我今遣八部禁兵，打煞疫鬼，遣令斥去千里。道

士化人，奉受三洞經法矣。

道言：自今以始，有奉受此經神呪經者，天上有三萬億玄刃大兵覆子等耳。子但爲衆生，日日教化，化一切愚人。愚人守迷，笑人行善。天遣煞鬼，打煞此人。此人等入三惡道，无有出期也。

道言：辛巳、壬午年，已有八千萬大鬼，來煞兩舌之人、誹謗道士之人、指師名道之人、評論經文之人、嫉妒勝己之人、惡言毀法之人、不解信三洞之人、不肯受道之人。如此等大鬼王等，共來煞之矣。

道言：自今以去，若有道士伏從三洞行道教人之處，吾遣九天大兵九十万億衆，一時來下，覆護子等也。若有一鬼不去者，十方力士來煞之矣。

道言：自今以去，若有道士轉此經處，天令三洞力士卅九萬人、六天力士八千萬人、卅六天大兵九十億萬人，一合來下，共煞此疫鬼，令主人疾病之者、官事之人，速得解脫，疾病輕差，和喻万神，令家親歡喜，中外社竈，悉令

分了，勿使枉攬主人。自非家祀之鬼，一切獲之，使永絕他方。若有不從吾令，鬼兵故不爲去，和魔王等，各各當受斬，斬之不恕也。汝等頌之慎之，聖不虛言矣。

道言：此神呪經乃卅六天魔王，魔王有七億小王名字，悉領其大王名在此經上。若道士轉經之處，卅六天魔王句處子等七十二小王，悉來伏耳。是以有人，能於末劫受此神呪經家中供養者，一切惡鬼不得妄來也。何以故，此一切大魔王遣力士來守此經，天人玉女仙人百億萬人來守護之，不令鬼兵敢妄前者也。

道言：自今轉經之處，若有惡鬼、惡人，敢復施惡意來向此主人之者，鬼王等及大魔王八億萬自誓，受三斬，頭破作三百分矣。魔王曰：自今以去，若有道士治病轉經，經行所作者，當令所爲如意，百願從心无圖不果。一旦從誓，弟子信民等受罪，乃斬矣。

道言：自今三洞流布，真人受之，況乎愚人者也。若自今以去，有人奉

受此三洞之經者，无量助懷化，所作所爲，大魔王護之。汝等道士化人，若有受此三洞之師，遊行極度人。若男若女有急疾病之者，道士爲之轉經，讀此神呪。三天大魔王召一切小王，來佐子之力耳。

道言：道士受此神呪經，不與餘經同受也，別自單受之也。書寫之別盛一物，行來佩之，刀鬼不近人也。作齋者，亦用无量神令矣。

道言：此神呪有一切鬼王名字，是以太上重之。有轉經之地，一切惡鬼不得近人也。自非主人家祀之親，鬼丈人不得妄來。中外大神、一切魍魎、生死之神、男女之殍、冢墓之鬼，自今以去，并走万里。若不如令，汝死万斬不恕之矣。

道言：中國有八万溺身鬼，鬼長三尺二分，動有万群，在水中亦煞人。人不信道化，善神不護，令枉死耳。復有九十八種水病，卅二種黑病、白病、赤病、黃病，病不可治之。有卅六種雜死病。此等病悉是罪人，國主不行道

法，是以病之，上亂中國。是以天下愚人聚生，不肯念善。天遣力士打煞之，令万病誅滅耳。若自今以去，有道士施立功德，建齋救人之處，令魔王等悉佐護此法師，令治病差矣。若不差者，魔王高鄰子等，頭破作九十分矣。

道告一切魔王：中國男女，自今以去，若有信經行道，受吾三洞，化行中國，爲一切人治病、轉誦經之處。汝等爲化愚人，佐助作福，迴風正雨，未令斬之也。若能如此者，覆汝等万位。一旦背誓，子等頭破十九分矣。

道言：天下有大神者，魔王爲大也。汝人與我，無爲烝同矣。而汝等所有異，百分不如我之一也。汝等以伏，爲我之弟子久矣，生死在我。万民悉在天地之中，多有不信道法。今始有三洞之法，流行乎中國。中國之人，有往往值經寶者。若有道士治病救人之日，子等助國，獲却驅逐之焉，未令斷其功德也。若一旦遠誓，斬之不怨也。

道言：魔王八億万王，王有小王，

又八億万王，各各宣令。自今三洞行處，道士治病轉經行道，汝等共助之。當令治病得差，所作者成。天人護之，風雨有時，不令有腦也。若一旦違神，不敬聖言，縱其鬼兵，不令有枉煞害善人三洞法師，妄有厄厄、疾病、苦惱，一切不如法，魔王烏留子等卅六王，悉斬之不怨矣。

道言：中國人人多有不信道者，其有往往受三洞經之人，汝等助焉，令善心生，未令自退也。若汝等護之者，天人必來佐子耳。自昔以來，民人病者衆，不唯一種，千病万病。或苦頭痛身重，手足不忍，吐下赤黑，或令人短烝。吾悉知汝等鬼名字，名曰慎夏哀子、角兒平王、阿信三案之鬼，千鬼万神，急攝汝下人，令主人病者除差。若不差者，汝等頭破作十八分矣。

道言：甲子之旬年中，有七十二種病，長安索虜暴煞人民，南走棄失，流分他國。國有二虜一吳，合來諍之。江佐劉復係矣，天下大樂。人鬼次苦，下人憂悲。遊魂之鬼，日來取人民，人

民死盡。其中一人二人，有愛經法行道者，而有愚人共嗟笑之。是以仙人不出，中國无仙人矣。

道言：甲戌之旬年中，國中國王，共鬪江佐，遶長安人，六夷相煞，多在西國胡亂也。天下无人主，蜀漢中有赤鬼三万頭煞人，人不信道。道常使董玄可、殷仲堪化天下，愚人不信，奈何奈何。天令遣百卅種病煞人。若有受三洞之經法師，法師來爲轉此經呪文者生耳。吾當爲勅一切大魔王及小王等。若有法師救病之處，悉令却小鬼，令主人病差。病差者，令汝等得遷。如不差死者，如太上口勅律令煞之。甲申之旬年中，國有卅九万黑鬼，黑鬼煞人，六夷之鬼也。大水皓皓焉，來中國，國王大怖，怖走九州。九州之民，來奔江左，江左之人多有橫死，死人如山，痛哉痛哉。到子丑之期，期年不至，有大煞赤烝鬼兵八十万衆，來取惡人民，人民不知。到壬午、癸未、甲申年，大水來誅人，及刀兵疫鬼來集。大鬼王蔣公段，共來煞惡人。自今以

去，小鬼來病惡人者，急去千里。若復不去者，大魔王等，頭破作八十分矣。

甲午之旬年，有卅六氏羌胡獠之鬼來煞人。赤鳥七十萬頭飛行天上，見人者自煞疫病。病不得治，悉坐不信至言、聖人之教，是以暴死矣。自今以始，中國有一人受經轉此神呪經文之處，大王及天人來助，令主人自差。差者，汝等上遷萬倍矣。若復不差者，汝大王小鬼等，斬之萬段不恕之矣。

甲辰之旬年，天下九十種病病中國人，人多暴死，六畜貴，人不信道。有一人受經行道，愚人笑之，是以天公遣三萬九千大鬼來誅之。今世有疫鬼，多來煞人。若有一法師來入宅，轉此神呪經者，生也。臣天力士八十萬億人來助之耳。若復不差令人死者，大魔王先坐小鬼等，急攝汝下人，來犯我良民，一如告下，不得違矣。

甲寅之旬年，有六十種病，六夷之鬼。中國多饑人，刀兵之災。國王枉暴，人民叛走。胡鬼三萬來煞人，人死者十有七八。王建顧之暴亂，人民多

有赤下。自今以去，有道士轉此經之地，令病人自差。若復不差，令主人衰凶者，大王先剉小鬼，頭破作卅九分矣。

道言：中國多惡人，聖所不居。時有一道士，建三洞之法者，天人悉來護之焉。自今以去，若有病人危厄、困篤之人不差者，大魔王斷其家挨小鬼。令病人自差者，大魔王等上遷。不差者，汝等身作萬分矣。天下九州有無極之小鬼鬼子等，各自去，未令主人死也。若不用吾教令，遣赤丁使者卅九億萬人，來煞大魔王等，不復恕也。急急如太上口勅律令。

道言：中國壬午年十一月廿九日，至壬辰歲十月三日，有七十三萬小鬼王等，專行入人宅中，急疾病人，病人者悉患之。李信、李陵二人，各領卅萬衆，鬼來取人命。今以知汝名，以識汝字，急去遠此主人。此有赤煞力士十二萬人斬汝，汝何不急走。身破分形不恕之，急去急去萬里矣。

道言：道士之法三洞，以先受此

神呪乃得入山，人間煞一切鬼賊。不受此文，鬼不畏人也。今有三千六萬暴鬼，其鬼來煞人民。吾知汝等名，急去千里。急急如律令。

洞淵神呪經卷第二

洞淵神呪經卷第三

……鬼矣。

道言：吾昔爲……來受之。各各持信受經之具，白綾五疋，青布裙衫一領，供治紙一百幡，筆一雙，墨一蠡，席一領，書刀一口，五方信米各一升，食五盤，菜五束。山上作壇，祀五方五帝，帝一盤食、一升米，與祀之。爲信乃折銀鑲一具，斬而分之與師。飲丹自約，曰：今日受此經供養之，終身不死。有急厄、宅中不利、口舌官事、刑徒在獄者，爲其轉經作齋。齋用菜食耳，不害也，无酒矣。解齋乃任主人耳，道士以此爲常。仙人等受訖，化行中國，爲萬民治病。畜此文者，一切鬼王自伏也。

道言：中國人多不信道，一人受經，衆共嗟之。謂自妖媚，不欲生活，入山避人，不求生官。不知此人天上生來，見世間惡，自求仙道，度一切人。人不識真，反更嗟之，奈何奈何也。此

人等後有重罪，罪入赤連地獄水火之中，三千億劫無有出。其罪畢作人，有人之形，无人之情。或癡聾暗啞，不知人事。復作六畜，食草飲水，以肉供口。生便執苦，无誰九告。此之罪人，輕法如此，子等思吾言矣。

道言：中國人多有惡心之者，不信真言。天遣橫行伐煞將軍八千萬人，仍遊中國，取此惡人。中國有奉三洞之人，鬼魔王三千人護之，隨逐覆救。若欲作齋，齋集之日，爲其清明，未令風雨。天人下助，助令光明。若道士行處，人見愛樂，道炁盈溢，未令病痛也。若惡人罵辱道士，爲作口舌欺圖者。即爲取其魂魄，打煞之，以明大道有神之驗矣。急急如太上口……

洞淵神呪經卷第三

洞淵神呪經卷第四

……不利，恕人家親。強生異□，

……六畜暴死。口舌官事，水火……不吉。此都是汝等世間客死之鬼，……中李子熬，浮遊雲間，來往海賓，東西南北。乘風駕雀，捉人鷄犬。鳥獸妄鳴，令作妖魅。妖魅生人，求其血食。俗師邪占，惚怖主人。卜言家親，家親共爲作祟，遂生鬼道。汝等小鬼，聞之因便，依峻放石，无有不下。以凶重加，无注不衰，害人元元，自謂汝神。如是以來，世人枉死者半。自今以去，大魔王等卅八億萬王，王有八億萬小國王，王等各各勅下，收取世間一切小鬼。何者疾病主人，令病人危困病苦，甚爲困篤，恐不生。令汝等速收病鬼，急去千里。若不從令，吾大煞將軍九億萬人，次次逐汝等鬼，斬之不忍也。魔王等，各各急攝之焉。

道言：自今有口舌向人云云者，太陰官廿四萬人煞汝妬鬼。若有官事

刑獄囚繫之者，導示君七十二萬人煞汝。畢陶木索升核鬼，及有水火之炁者，吾遣宋乾文昌，領風水將軍廿八萬人煞之。悉令解丁令鬼、山圖木子鬼、犬狄走死鬼、六畜人形鬼、五木百魅鬼、蠻幾氏蠍鬼、北狄羌虜鬼、山上鬼、山下鬼、水中鬼、火中鬼、射江萬種鬼、十二亂虐鬼、六畜奴婢鬼、自刺自煞鬼，一切大小鬼子，自今以去，入地千尺勿復。更令主人病患者差，官事者了，鬼炁自散。若復不去者，斬汝等不恕之也。

道言：自今以去，道士爲人治病，病人家來迎子。子等先爲作符安宅，十二辰上，門戶之上，及井竈清廁上，各各丹書懸之。作符吞三七枚，一日三與服之，夜亦三服。道士三爲庭中，北向上口章，請於轉經行道，用三昧步虛。若不能作大齋者，但即暮，道士三時行道。若能作大齋者，一一如法耳，亦訖布施。布施者，天神爲人，可利人耳。不布施，經神不祐人，令人有罪，病即不差。

道言：靈圖既煥，萬帝朝真。口詠仙章，記後聖人。太上案筆，王妃拂筵。鑄金爲簡，刻書玉篇。出於空洞自然之文，帝王寶之，社稷長存。紫雲吐輝，流灑諸天。檢錄天度，選擇種人。祀維丁卯，當由其賢。命召五帝，嘯朗九玄。昌季之秀，日下十田。金石入卯，草木罡堅。三鱗之代，庚子之年。吾之大道，合於空乾。五龍飛泉，正戈爲先。聖女開釋，流祚百千。既知其母，復知其子。既知其子，復守其母。有國之母，可以長久龍久。龍漢之下，赤明之後。積德累功，在乎文武。文武千萬，始從我願。五穀自生，无相責恨。九都上格，其名分明。下循中土，上化玉京。善者立言左宮，惡者記之右宮。年月之期，如吾所記。寶而行之，必招大福。輕而洩之，禍至滅族。是時，諸天一時稽首作禮，而作誦曰：

天尊迴玉駕，無極天中王。靈書八會字，五音合成章。天真解妙韻，普成天地功。上植諸天根，落落神仙宗。

地獄五苦解，刀山不生峰。堂堂大乘化，一切不偏功。如是靈寶法，是爲王中王。煥爛飛空內，流光三界庭。神圖啓靈會，玉書應景生。

道言：大聖龍興，下世度人。誅罷僞座，退剪逆人。壬子之初，乙卯之年，至甲子之旨，以保甲申。遇吾此道，其祚自強。

道言：今有三洞大法，法中最上。若三界之中，有道士男女之人，有受經者，鬼王護之。令治病悉差，人鬼无他。自今以去，若道士轉此經，疾病不愈，仕官不遷、刑獄不解者。鬼王青真，大魔王等，頭破作十二分矣。

道言：十方諸鬼，一切真僞邪神，萬八千道炁，三千六萬赤鬼，自今以去，各各攝汝等下兵兵士，一切勅之，令斥去万里，未令病虛萬民也，及此間土地之靈。若道士所行之處，病自差愈，萬願從心。若一旦不如法，汝等大倫鬼王，頭破作三千分矣。

道言：今人虐病者，連子所爲也。天下十二種力士，自今聞太上三洞法

師、道士救護病人，轉經行道男女之人，作齋之家，若不助道士，令主人病不差者，斬煞之，不恕矣。

道言：連子等八十萬人，專行毒炁，令人溫炁重病。令連子卅六萬人，下行因痛。自今以去，汝等攝汝下人。若復不去者，此二鬼王等，頭破作六十分矣。

道言：中國无有善人，善人者，天上來耳。國王大信道士者，天上生也。今有奉三洞之者，先世之重緣，今則聞見也。自今以去，若道士化行之地，鬼王追逐佐之。有病令差矣，勿使死也。若一旦不如法，斬之不恕之焉。

道言：中國人不信大法，是以多有罪人，罪人入地獄。鬼兵亂行，善惡不別。今中國有一人受道者，大魔紫真、犯倫焉、延歸、案淵等，各各助爲作力。令道士心堅，固主奉之，開化愚人。若道士治病之處，鬼炁自攝，斥去千里。若不伏者，魔王等斬之不恕也。

道言：今十方之鬼，則魔王所統也。自今以去，不聽枉煞良善，晝藏夜

行，取人男女。道士行處，鬼王佐助，未令惡人邪鬼觸犯道士也。若有人鬼圖向道士施其惡心者，一一誅之。令人鬼俱死，以明道心。太上至言，汝等慎之。若一旦不從，斬之不恕矣。

道言：中國罪人有八十九種煞鬼，山林水火風土大鬼三千九百衆，大和鬼王領之，行萬種病。卅二種六畜之鬼，鬼王名都奴，領八十萬鬼，下行惡創下血之病。復有三千烏鬼，鬼王名文變子，行赤病白癩，人不可治。中國之人有作惡之者，不信三洞之要者，悉值此惡鳥飛來下此病，病之万不可差也。自今以去，若有道士所救人之處，便令疾病除差，万願從心矣。鬼王等，遷功万等也。

道言：中國有三千九万人應仙，奉川漢蜀三吳之中，孫道留、王子寧、唐万生、焦石子、劉光之、馬承慶、苟太初、司馬平、郭秀之、丁大倫、樂法護、謝莫女、侯王子、林元伯、任元孫、支道林等，三千人爲杜蘭香採藥，悉來當官中。今世道士，一心受此三洞法，亦得

與此仙人等相值耳。道士但力自救万民有厄之人，令得无他。汝等行道轉經之地，魔王自伏耳。若不伏者，次次斬之不恕也。

道言：三洞之法，神呪爲要。何以故，此經伏一切魔，魔王不得遠之也。自今以去，若道士經行之處，魔王卅九王，烏川、連子、文吉、休渴、憐子等三千六百小王，各各護治此道士，勿令犯觸此道士也。若爾者當汝等，令升仙无爲矣。若不救此道士，助惡爲勢，忽壞亂道法，令道士治救不差，所爲不差，一旦有惡者，魔王等悉坐斬之不恕。一如太上口勅，急急如律令。

道言：中國有卅九万惡鬼，鬼來病人。鬼來病人奄死，行万種惡炁，炁來煞人，得道士轉經之時則正。國王亦信道，行受三洞，子孫傳貴。大魔子烏純林期八千万人，壬午、癸亥之年，領万鬼煞人。以知汝名字，自今以後，不得枉煞人。煞人者，大魔王小王等，惠信忿陽，各各斬之不恕也。

道言：中國壬辰之年，有真君亂，

出李弘三千万人，主者一人耳。時世多病，男女之人，壬午年入山，人間懃化愚人。愚人不信道，不受三洞，水來煞人，刀兵交興，奈何奈何。惟有受經道士，魔王護之，終不死也。當令道士治病，病无不差也。若一旦不如法，魔王等頭破作十八分矣。

道言：中國多有惡人，不知有道，見善不從，是以多死。今有三洞法師，人鬼所奉。若自今以去，道士之人轉經，經行之處，魔王等不得遶之也。若一旦違令，鬼王等天斧斬之不恕矣。急急如太上口勅令言，一一告下，卅六天魔王魔王子一切等矣。

洞淵神呪經卷第四

洞淵神呪經卷第五

……害万民死，……三洞妙法，……而愚人頑心，……之後悔无及也。……怪万……煞大鬼，□氣誅之。壬□□年，天下終終，鬼兵來誅煞惡人。道士所救之者，天人自護之，護之爲禁百鬼耳。

道言：甲子旬中，有八千赤疫鬼，鬼有三万九千人來煞人。人有知者明白，於道士受此三洞經之人，爲其轉經者，疫鬼自然禁也。鬼名曰憂連，身長三丈七尺，手捉赤索，仍來入人宅中，令人口舌鬥諍。自今以去，有法師經行之處，皆當禁之耳。

道言：甲戌之年，有卅六種病，病煞惡人。自今以去，法師轉經者，天人共來下，禁其疫鬼，令不煞人也。甲申之年，七十万惡鬼，鬼來煞人。若有時得法師救之者，天人悉來下，共佐道士禁疫鬼矣。

道言：甲午之歲，有八十万種疫

鬼，鬼來煞惡人。惡人不信大法，壞亂吾道，道士不能化之。甲辰、甲寅年，卅六万疫鬼來，來煞惡人。惡人之多故，故天丁力士來下誅之耳。道士急行化愚人，愚人不信，此爲大迷，迷人不悟矣。奈何。自今以去，若有疾病官事之處，我當遣三天魔王、十方主者，來下禁之。及轉此三洞經之地，療救之家，逐鬼禁之矣。

道言：中玄者，太上所說，已在八景宅中九合之室端坐，思惟何國苦樂、劫數近遠，衆生攸攸何所趣向也。三灾垂及，愚人不覺，自共相欺，枉攬誹謗。不用真言，不尊有德，見人作善，及更嗟之。當入地獄火車劍樹，此痛難忍，狀如鹿兒，自作自受，无人代之。吾今通視，視見一切，豈不示導之乎。於是，乃爲衆生集大真人、山栖道士、十方仙人、諸天官屬、八方大魔王，男女勅之禁戒神呪。恐後世之人有枉死者，大水將至，無有知之。勅魔邪鬼王，令不殺万姓，教化愚人，使受此經。經中之王，神化神呪，凡有四卷，太上

特爲將來濁亂衆生說之耳。若後世有緣之人，先身有福者，得聞見此經。此經消災，受之不在災中，天人來迎，得見真君矣。

道言：上清无量三洞，令人升仙，神化神呪，伏一切鬼。道士受之，山林人間不畏驅除。此二卷亦可，不用餘經，令人得仙，无疾病矣。坐中十方仙人，天男天女，聞之大喜，各各求受此經。悉共起曰：不審此經受之如何，供養之法作何等也。唯願天尊，具示誨之，我等亦當奉侍之焉。若知可否，政爾供拜之也。

道言：此經伏魔，除一切災。若有受者，鬼兵不撓人也。若國人憂，有他賊來，一切及有官事疾病，久在困地，困地弥月，无人能救得。聞見此經，其苦自解，万灾自消矣。若有受者，仙人來扶。侍受之法，用命素冊尺，齋食棗果。祠五帝，白米五升，紙百枚，筆一雙，墨一丸，淨席一領，書刀一口，於其野靜中受之，不令露地也。不爾，作壇訖受之。奉師如日月，愛經

如珠玉。當祠太始五帝之神，乃破契受之。受之竟，寫經三校。有病之家，道士爲轉。轉經之時，先作八符。符置八方門戶上，乃爲經行之家。鬼賊外殍，一切諸鬼，聞此神呪，自然散□。善神助子，万……經，力士自來……等。若有能受此經……時仙人來迎，不愁无也。子等信吾言，吾復何憂之也。

道言：自今以去，受吾經契者，令善神助之，鬼王自伏，不令有惡也。汝等道士信之，勸化一切，使愚人得免三灾。若有受持此經，不度三河者，吾不名聖人矣，不在世化也。太上作是語也，乃占十方大神、一切惡鬼、邪魔大王，重禁勅之。自今以去，轉此經處，百病自差，官事解了。受此經者，万願從心。坐中大衆，聞經歡喜，各各受契行之矣。

道言：汝等道士，但受此神化神呪二卷，亦令人得仙耳。何以故，此經伏一切魔，善神守之。若有受之人，先世有仙骨，天上來下，非世常人也。中

國男女六夷，來世入亦有伏化之者也。吳蜀之國，人多信道。四方流離，智者即入山。大水甲申、壬辰，知之道士，慙自相化，化度一切。若有勸受此經者，天人福汝也，終不橫死矣。

道言：汝等雖受上清靈寶无量三洞經，不受此經者，不得仙也。若不受此經，不名道士，不得療治万病矣。但受此經，家中供養，一切皆伏，生死蒙恩。道不虛言，汝等信之。坐中大小，各各求受之焉。太上哀念一切，悉爲受之。戒汝等，受此經，不得慢經，不得輕邪，終身奉行，思神念道，後得升仙，九龍來迎。大衆聞之，心中踴躍，□各驚起，稽首三礼。

道言：汝受此經，當寫治經卷，立其靜室空舍之中，淨處高坐舉之。月旦十五日燒香，朝拜十方，并復朝師。師去方所在，四拜拜之。若師同……朝也。大衆得教，各各三礼奉行。

洞淵神呪經誓殄品卷第六

道言：自今以去，至甲戌、壬午

年，中國沙門衰厄死亡。彼土道炁日盛，盛在江南漢蜀之中。三洞流布，六夷死盡。鬼兵縱洩，毒害百姓。疫炁煞人，不唯一方。自今以始，若有奉受此經者，三天護人，及有殄鬼，一切邪精，吾當與誓。令法師所救之人，令官事解散、疾病蒙差。太上遣三天力士卅九萬人，收天下大殄男女之鬼，令斥去千里。道士遼治，无不差愈。十方大神，助此法師治病來焉。

道言：自今以去，若有疾病之人，得三洞之師，轉此經處，一切疫鬼聞之，鹿走万里，不得來干犯。當令官事刑囚，自然消散。若不去者，我我遣十方力士丁然汝矣。

道言：辛巳、壬午、癸未之年，天下七十二種病，病煞惡人，惡人多不信道法故也。自今以去，中國若有法師救此病人之處，我遣九天主者爲斷，誓

外殄一切惡鬼，悉令遠斥他鄉，不得犯此法師所救之人。急急如太上中天禁令。若不伏者，天丁力士來下誅汝，斬之不想汝矣。

道言：自今以去，若有道士爲人轉經行道之處，便太上玄堂，天人所止。若有官事疾病者，悉應蒙愈，口舌不生，囚徒自解。何以故，此太上妙言，今口所說此故，故令三天力士誅其疫鬼矣。

道言：於今有法師，不貪世官，自求三洞，專行凡人。見世危厄，一心遼濟，右官事疾病，爲其救之。如此之人，先世大福，福流中國，今故來生，爲衆生之師耳。我今見此法師救病之處，與一切疫鬼，誓不復來。中外之殄，男殄女殄之鬼，悉誓自去，不復來矣。

道言：自今中國，洪波鬼兵流行。甲戌、壬午之年，多有赤幘鬼，而在九州，千二百群，萬八千騎，三億縣中，煞害良善，病痛急疾，致使太上真民死不以理。於今方至甲子、壬辰之歲，流殃

萬丈。皆是汝等之妖鬼，古之死將、國主、大臣、下官故炁，世間鬼賊耳。鬼女之殄，水火刀兵之殄，行客之鬼，因世人之有興衰，競來剋之。圖害萬民，取其名譽，希其血食。千千万億，遶人舍宅，作其光怪，令人口舌刑徒。自今以去，若有不信吾言，徘徊此宅不肯去者，十方大煞將軍卅萬人，來斬汝小鬼，不得復留，急急如生官口勅。若不去者，磨王俱留子等廿萬衆經，破頭十二分矣。

道言：三天魔王句婆，差羊十二萬人，汝住中國。自今以始，若有赤丁火鬼，各領七十八萬人，作其疾病、病一切善人者，違和鬼兵三萬六千人執縛之，令付九天之獄。令天下良民，疾病除愈，人口平安，刑獄自正，万事解了，口舌不起，圖求者得，以明大道無極之施。若不勅云云。若其然，汝死。當民不去者，七天魔王，汝頭破作廿分也。

道言：中國甲戌、壬午年，有黑足鬼，身長三丈六尺，其目赤黃。或化爲

赤鳥，名之曰行病。千萬爲群，飛來人上，令人急病。病苦身黃寒熱，下利赤黑，面目焦青，乍來乍去，不用飲食，飲食便吐，吐血溺赤，頭痛筋攣，手脚不拘，此皆黑足鬼也。此鬼主名大頭，頭盧兄弟八千萬人。以知汝名字，急去千里。若不去者，斬之。急如律令。

道言：自今以去，甲辰之歲，有卅九萬黑面鬼，鬼王名章常，將下人卅六億，遊行天下，主行下利疾病。有行匈、背、腰、目痛，目中水出，聲咳不利，令人家口舌紛紛。鬼兵遶舍，倚人門戶，四方八角，取人小口老人，死亡狼藉，悉是此鬼等也。自今以去，不肯去者死，利利煞汝不原，鬼王頭破作八十六分矣。

道言：復有廿萬赤索鬼，鬼王自首，領卅九萬女鬼。春來取男子，秋若取女子，冬便取小口，夏來取老公。晝日在水中，暮來伺人家。或取六畜牛馬，行其大毒。令人家貧窮疾病，病不可治，日日來取人。自今以去，汝速馳

走。若今不去者，頭破十二分，鬼王被誅也。

道言：中國甲子之旬，有白下鬼三萬頭，鬼王名赤都，遊逸天下，行七十八種病，病不可治也。令人狂走，妄語下利，雍腫下血，血出而死，炁息不定，烏鵲遶人宅中，此則鬼也。亦令天下國主大臣暴死，死不以理，男女多重病。自今以去，汝等鬼王，攝汝鬼兵，不去者汝死，頭破作卅八分矣。

道言：甲戌之年，有赤壁鬼，鬼身長八千丈，卅九萬億人爲一群。化爲大魚，魚長七丈二尺三寸者，化爲飛鳥百萬而飛。飛天下行卒死之炁，令天下兵起，死入刑獄，口舌妄來，門門病痛，此鬼等也。鬼王悉朱，急攝汝下兵。自今以後，斥走万里。不去者，汝等頭破作三千分矣。

道言：甲午之旬年，中國有黃牛鬼，鬼王名赤石，領馳則赤頭鳥九千萬人。入人宅中，取人小口老人，行萬種病，病炁重多。土公雲中，自稱李子傲三兄弟，千千億萬爲侶來，煞人不以

理。自今以速去他方，若不去，令人病死，宅多口舌，田蠶不收者，汝等死矣。鬼王赤石，頭破作萬分矣。

道言：甲申之年旬中，有鬼王名蒙劫王揃，各領三萬人赤鬼，仍行天下。令人炁病，下利身重董，面目腫，頭痛匈滿，吐下不安，小兒驚啼，官事口舌，死人刑獄，千病万痛，貧窮厄悴，生子不立，田蠶不收，万願不果，此皆王揃等諸鬼王所作。自今以去，蒙劫、王揃不攝汝下兵者，汝等下人死盡，鬼王頭破作八十分矣。

道言：中國自甲戌之旬中，有鬼王五國鬼兵也，宋、趙、燕、魏、魯之死將、國王王耳。各領三萬六千人，遊行中國、蜀漢耳。天下女子、小兒、老公，行卅六種病，病煞人。自今以去，知汝名字，鬼王淮南、子返、白公、韓沙、宋洗、王善等，自今以去，知法下人，未令來煞人也。若不去者，汝頭破作七十分矣。

道言：甲辰之年旬中，有三萬九千鬼，鬼王名旬留那，各領八十万鬼下

來，下万六千病，病不可治。治令國王，妄召百姓，枉其万民，民不自全。鄰國賊來，惡鬼入宅，宅不可居，皆此鬼也。自今以去，汝鬼王等，命汝下人、鬼兵自攝。若復不去者，赤赫天都斬汝不恕也。子等未令天下人枉病病者，急收汝吏兵。急急如律令。

道言：天下乱矣，水來不久也。人民勤受道治，以化愚人。此鬼王等，受三洞之法，奉尊師訓，自來束首，不敢侵汝。道士但自供力，受上清中玄，令百鬼不近人。受三昧者，自然得仙也。受導化者，魔王自伏。受大驅經者，天人助人。受无量者，面見真君。受記仙者，仙人來護之。受黃庭者，太上自來耳。此三洞之真要也。道士者，男女之賢，奉受此經行來之處，治人病，病无不差。若鬼王自伏矣。若有不伏者，力士黃英，次次斬之矣。

道言：中國多惡人，故有此鬼王等暴煞人耳，餘國无此也。自今以去，男女之者，有受三洞之人，鬼王敬奉之。一切人道說欺枉罵辱圖謀打持

者，令其人身考滅，消亡子孫，七祖長幽。如太上口勅，急急如律令。

道言：自今以去，中國有疾病者，三天卅二魔王烏鳴鳩苦等死矣。急攝汝下兵，不得流毒煞人。法故不去，遣赤卒小史八千万人，下九天太上真騎，煞汝等矣。速取汝下人，令鬼兵自伏，生人平安，天下陽陽。汝等不去者，魔王等頭破九十分矣。

道言：中國有九十五小鬼，鬼來煞人。有得大道士，受此三洞之呪文來爲轉讀者，鬼王等助之。力士爲却小鬼賊，和喻家鬼，中外社竈，竈君外殍中表之鬼，一切分別之。宅中伏尸，他來之鬼，家中不祀，一一爲收之。付天北獄煞之，未令煞主人也。若復不信吾言，汝等大魔王頭破作十分矣。

道言：自今有一人男女病者，悉是汝等小鬼王也。自今有道士來轉經之處，汝等急去万里。令生人自差者，吾當遷汝等耳。不差者，斬汝万段不恕之矣。急急如太上口勅律令。

道言：今有一人疾病，此悉疫鬼

所爲。中國大魔王不加用意，令小鬼煞人耳。自今以去，大王小王，急助天人道士轉此經之處，令主人病差，口舌官事自消了。若復不差，鬼王等斬之萬段不恕。急急如律令。

道言：中國惡人多，壬午之年，道士入山者，競共嗟之。大水奄來死矣，不知，奈何也。聖人豫見未然兆，故先作三洞之要，以示万姓。万姓不用，不受不奉，與泥同流。痛哉痛哉，太上爲一切衆生，故流淚五行焉。

道言：自今以去，有暴下病人、官事口舌，悉是鄧侯之鬼興劉升鳥，亦來煞万人。天今遣赤宮將軍廿八万人，領衆煞之矣。大鬼王等，自今以去，急攝汝下人，馳走万里。若復不去，令主人病不差者，汝等死矣。急去急去，如太上口勅律令。

道言：自今中國有八十万小鬼煞人，其中有一人受此神呪經，大道士來救之者，汝小王大魔王悉來共助之。令小鬼促走，病人得差。若復不差令困者，小鬼等死矣。急急如太上口勅

律令。

道言：中國有卅九萬人惡人，惡人不識法，聞之不信者，今有三赤煞鬼誅之。若其中有一人信心，天人來化也。復有八千疫鬼，入宅取人，時有道士來救處，小鬼等自死也。

道言：惡人不信，是以中國多有愚人。合生時有信經受三洞者，天上來也。自今以去，若有病人不差者，大魔王等先坐之也。自今以去，急攝汝下人。急急如太上口勅律令。

道言：自今奉三洞之道士，先爲一切衆生受此神呪。若有病者，請道士救之。有請之處，天人魔王等不爲助之者，汝死汝死矣。

道言：今日主人爲疫鬼所中，委厄困篤，命在須臾。自今以去，若有道士救人之地，大鬼王等，急令病人病差之者，汝等上遷。不差者，汝等死矣。

道言：汝等道士，爲一切急行救之，吾當遣三万天人助子。自今以去，道士者救人之處，天人力士護之，令病人自差。差者，天人魔王等上遷。不

差者，汝等死矣。急急如太上所勅律令。

洞淵神呪經誓殄品卷第六

洞淵神呪經斬鬼品卷第七

道言：自今壬午年三月至九月，人民疫鬼煞之，十分煞三七，刀兵之世也。六夷當死，雜法法衰。道士日盛，三洞流演中國之中。皓皓日月失度，人民勤苦，死者門門。若有奉持三洞化人，受之有病轉經之處，吾遣十方力士，化喻疫鬼一切邪精。令收此病，令得命長，差愈无他，有囚繫自然解了。若不蒙恩，魔王先坐，斬之不忍矣。

道言：甲戌之後，三千六万三足鬼，身長九丈，手捉赤棒，入人宅中，行六十二種病，病煞人。乘風雲，專取人命，暴人六畜。千二百青病鬼，疫鬼兄弟八千万人，男女之鬼曰有九億，來入人舍，伺人小口，令人卒死。復有兩頭鬼，鬼名當進進，暴虐常恐百姓，百姓得病。此鬼妄食，煞人猪雞，詐作大神，欺枉愚人。愚人信之，煞害六畜，亨飴小鬼。小鬼便成習常，不得便病痛急疾，此爲世間疫鬼，疫病人耳。自

今以去，有奉此經之者，吾當遣三萬九千天丁，和喻此鬼等，令斥去千里。若不去者，三天大魔王及十方主者斬之萬段，終不恕也。

道言：壬午、辛巳，有卅六種大鬼頭，然又名赤蓋，三名阿駒，各各將三萬九千人，齊執白刃煞鬼之刀，刀長七尺。仍入人宅中，專取人命，行百廿種病，病煞人。有六十種惡鬼炁，入人身中，令人卒死。自今壬午之年，已有如此病者，得三洞之師轉經行道之處，悉令得差。若復不除，令主人病不損、官事不了者，九天魔王等及十方主者，斬之不恕。

道言：若壬午年，已有三萬七千赤鳥，行三萬九千種病，病煞惡人。復有八十二種病，病不利惡人。若得此病時，時三洞法師轉經行道者，卅六梵天天王來助護子等也。疫鬼鬼兵，自然消散。若不去者，我遣三天力士，十方赤□收而斬之煞也。道士得奉三洞者，但護化一人入道，天人亦喜。壞一人之心，天人誅汝，汝不得人身，有何

仙也。自今以去，若有救療人病之處，天人自來往護子耳。……三天玉女要進將五千萬人，一合來下，與麻姑遊在杜陽山中。過歷五岳，見中國之人疾病死亡，不惟一人。玄女驚曰：叱叱天災，人民死盡，當何以救之乎。相與悲嗟，來詣玄都，具白太上。太上曰：汝等往中國，化一切人，令奉三洞。三洞之經，能度衆生。諸女等悉來中國，化人經典。能令敬信者，有病官事。若有轉經，轉經宿昔，死人更生，官事自解。若自今以去，有法師救病轉經之處，我當遣人化喻之，疫鬼自去矣。

道言：此三天女，先有大福，今得爲聖女，教化一切人，十方之尊也。一日百變，莫有及者矣。今後世人，有聞見此三女名字者，此女等亦來救子也。若有疫病官事者，轉此經，十方大神自來救之耳，不令有惡也。子等化人善焉，若有化人善，天自知之矣。

道言：自庚辰年，已有九十億萬黑煞鬼，鬼長六丈，各將八萬四千小鬼，共領赤頭疫鬼來伺人。鬼名盈女

笄子，悉赤目，專行十方，入人宅中，取人小口，行百種病，病煞人。自今以去，有法師轉經治病之處，疫鬼急去千里。若不去者，三天大神喻之。若復不去者，力士縛之，不復恕矣。

道言：壬午年三月十日，有赤天疫鬼十二萬頭，各領三萬九千力士大兵。復有七十萬黑民鬼，鬼名蛇舍，悉有八萬六千從來，下煞中國惡人。若自今以去，至壬午年，有急痛之處，道士經行救者，此鬼不得住也。若須臾，九天力士斬煞之，不復恕矣。

道言：自今以去，中國有八十万三足鬼，十二頭疫鬼。鬼來煞人，行七十九種病。病人有得三洞法師行道之者，此鬼等自然天人收去之。若復不去者，三天力士必斬之耳。

道言：中國辛巳年九月，有三千萬赤目鬼，鬼名角子，各將卅九億小鬼，鬼來煞人。人有值此病者，急求三洞之師，師來入宅中，鬼亦自去。若不去者，天釘力士九十萬人，次次斬之，終不恕矣。

道言：甲午之歲，有八千万小陵鬼，鬼名赤頭，各自將八十万人，下九十種病，病煞人，令人腫痛疽病。若自今以去，有法師救病之處，此等鬼自然速走万里。若復不去者，三天力士斬煞汝，无有解脫也。道士化人，令鬼喻去焉。

道言：自庚辰之年到壬午九月、十月，中國人多有病。有九十三万黃身鬼，鬼名百龍，各自有十二萬小王，鬼來病人。自今以去，若有法師轉經之處，此鬼自去。若不去者，天釘力士、三天大兵來，共斬汝，九天魔王將汝治罪矣。

道言：自今辛巳、壬午年，已有九十六種煞鬼，鬼來煞人。村村有卅六万黃疽鬼，鬼來入人宅，令人吐血，下利霍亂，卒死心痛，身著黃病，咽喉塞痛，以致死亡。若有得法師經行救者，三天大神和喻此鬼，令斥去他方，万里之外。若不去者，此鬼等頭破作十六分矣。三天大兵、九天力士終不置汝也，道士化人喻鬼矣。

道言：自大漢之後，有五尺大鬼，

鬼名王煎、白起、韓章、樂陽、楚狂、郝景、女媧、祝融三万九千人，人領八億万人。此鬼從伏羲以來，帝王相承此大鬼主，各領十二万人。天下小鬼，依憑求食，與此鬼王作兵刀，來耗動万民，万民患之。各各伺人之家，取人男女，病病厄急，口舌、官事、水火、田蠶不收，子孫暴死，六畜不盛。鬼兵熬熬，千万爲衆。枉其良人，病煞无辜。勅人家親，摧捉竈君，令人宅中神不安，每事不果，行万種病痛急疾。乘風駕雀，妄作光怪。自須以來，不唯一條。今遣正一功曹、太明使者、監神使者、迴煞使者，各領鐵騎九億万人，手持大戟煞鬼之具。太上強力健士卅九万人，一合來下，收捕此土中國死將之鬼、一切魔邪。百千万媚，不政之殫，來病痛主人之家者，一一爲灾人等，收捕打煞之，令蕩除宅中煞鬼。生民鬼王等，悉加用力，次次縛之。若有一鬼不去者，鬼王等千斬不恕。急急如律令。

道言：中國有大鬼主鄧艾、鐘士

季、趙凶、王莽、李哉、杜周、劉斗、王離、夏侯嬰、蔣公琰、南陽葉公、北里夏支、蕭何、由白、韓信、佃進、梁洪、高沛、孫溫、司馬迴、劉无達，有此大鬼主，令世人或有祀者，與武帝、文王，人悉立祠祠之。今世間傳養，立祀不絕，各各有兵馬百万，爲天下人作祟，崇病煞人年命月日，行千万種病。或四支沉重，寒熱勅色下利，腫痛腹黑，頭目悉痛，胸背懊熱。或有黃疽咳嗽，咽喉不通。一切万病，煞人无度矣。

道言：此等之人，皆悉是往時大將，在事之後，死亡之後，各有人立祠，祠之不止。今傳有百鬼附之，唯成大衆，仍伺人刑，便煞害百姓。令人水火、口舌，官事万凶。凶來奄人，人口多卒死，從來非一。今遣赤廬大禁兵，身長万丈，八十万，人領三億万衆來下，將捕此等之鬼主，得便斬煞之，不恕矣。

道言：今此三洞法師轉經救人之處，當今詠兵九十億万人，護此主人之

家大小口數。若有病人官事刑獄之者，一一令解了得出，病愈无他。无他之日，鬼王上遷。若不差委厄者，大魔王毛帝等，頭破作九十分矣。

道言：自今有病者，及轉此神呪經之處，當遣万和卅万人、百舌吏卅六万人，爲此主人疾病之家、刑獄囚徒之人，和喻家親太祖父母、内外强殍及祠之者。不應祠者，悉爲分別遣之，悉令了了。又告刑獄之鬼、罽陶木索之君、十二令史、八十卒侍、一切長候、三公九卿、上下大夫、十方主者，急開獄門，出有事之人。迴化口喻，令時君歡喜，放之令出。亡人上遷，去離三塗，得在朱鬼輩中，逍遙无爲，祐和生人，生人疾病者差，万民解了。自今吾與鬼王判決，若復故來不差者，大魔梨洪等，頭破三千五百分矣。

道言：告大魔伏仁，今有主人疾病，苦四支五體，咽喉不利，頭痛目眩，胸背輿痛，飲食欲吐，夢悟不靜，但與死人相逐，害人大小，无无恐不全生。死亡之期，奄至不久。今告丹誠，哀情

可愍。今遣大煞候王大兵八十億万人，候取地下鬼兵。疾病主人之家者，爲是何鬼。若人太祖父母，不應來崇。若非所祠，自有所系。若是社竈，祠祀有時。若是宅鬼，不應害人。今世清鬼，苦不得妄來。若有宅中故炁，四面殃殍，一切惡鬼，山林池澤之鬼者，一收之。付三天地獄，鬼律女青詔書治之，不得令來下，急病良善也。自今以去，急收汝下人。若主人不差，官事不了，大魔王千斬之畢矣，不恕之也。

道言：甲子之旬年，八十万赤病煞人，卅六万黑鬼王，各各將六夷之鬼十二万人，入人家宅，令人寒熱浮腫，四支赤熱，不宜小兒，產婦暴死，三公自罰，天下亂流，水旱不調，虐鬼且來捕人。國主自病，坐有枉濫，萬民嗟天，天怒遣三万黑面小鬼煞人。汝等欲得脫此鬼苦者，各各受三洞真經，若有一將軍錄者，鬼不敢妄煞之也。

道言：有病人之家，若犯事刑獄，无无恐死者，當先立此齋。齋有三人、五人、十人、八人，張好薄帳，若淨屋之

中備厨，具令辨集人，令淨潔。請三洞法師，法師，務取一上聰明、了了分明者爲法師。法師與主人唱導，布二高座。高座上一人，稱和爲主，其餘道士，次次旋行耳。高座上法師，執步虛立成。稱唱之下人，旋行徐徐，高趣而望天，若聽雲中有鴻鵠聲。又各聽遼遼響，若似玄中有天人歌矣。

道言：有病之家轉此經，一切大魔王與小王、小鬼王要誓曰：今人作齋，行道救病，病人甚危，兼有口舌、官事、刑徒、囚獄，汝等令差。名喚万鬼，對之何鬼爲也。汝驅之，令自然得差，官事了了，百願從心。无他之日，大鬼小鬼悉令上遷耳。若自今以去，官事不解、疾病不愈者，大魔王及大小鬼王，斬之不恕矣。

道言：中國甲戌之旬年，有三千九百白鳥來行病，病煞人。國中大小各卒死，多有溫炁八十種病。古之死主孟達、馬授、李卯、王鳳、閭振、左丘、盜者、魚父、華元、古成供等，各領万人。專行下利赤病，令人少炁，宅中不

安。倚人門戶，取人小口，恐人家親。家親畏人，逐隨使令，是以不祐，病痛生人。生人今合門疾病，士官不遷，宅中虛耗，口舌妄起，觸物不吉，連遭刑獄，囚徒來久，田蠶不得，萬願不果。悉此等鬼王不攝，縱其下人，令主人如此。自今以去，各各執持汝等鬼兵，勿令暴虐。當令主人官事了散，疾病輕差。輕差之日，汝等上遷。若一旦不差，汝等萬斬，頭破作八十六分矣。

道言：甲申之旬歲中，大灾起西北，水來病死，十有八九耳。三千九萬赤鬼等，專來病人，不宜婦女、小兒也。時國主往往有信法受持經書者，但疫鬼甚，放三千九萬種病，病煞人。人有入山者，千千万矣。中國荒流，人民不安，刀兵鬼煞人無道。天遣赤卒七十七萬人，持銅戟斬煞邪鬼，收世間一切強殍。三天大魔王，若有枉煞地下之人者，各各斬此大魔王鳥丸等，不恕之矣，促去万里。急急如律令。

道言：中國多惡人，天遣力士誅之，不問善惡也。天兵大眾，何可制止

乎。但道士轉經救者，令生，勿復煞之也。若自今以始，天下人有疾病及其刑獄囚徒，道士行章轉經療救之處，大魔王與小王救之令差，萬事了了。若有不差不解，口舌連綿，大鬼義真等斬之萬段，一一不恕矣。如太上口勅律令。

道言：大門鬼吏真公，小門鬼吏小真，房門守吏哀文，後門守吏萬倫，竈門守吏炎景，廁上守吏奴之，道上守吏尸供，內外大鬼，宅中強殍，男女客死，水火金木之所煞害者，各自約令。何鬼來病主人，主人今危厄。太上遣力士赤卒，煞鬼之衆萬億。孔子執刀，武王縛之，鐘馗打煞，得便付之辟邪，傳與天一北獄。恐其有枉，今勅下萬民，若有疾病主人之家者差，來放之令去，使主人病愈，人鬼無他。若復不出鬼者，令病人不差，大魔王小王等，身斬百段，必不恕矣。一一如呪語，如太上口勅，不得留停，急急如律令。

道言：世人今多疫炁，自今以去，

與大魔王夏銀、鳥丸、延赤波、洪丘等誓曰：今人多病，中國罪人死至不覺，不知自度。吾令三洞法師化示愚人，愚人往有一人信者，男女之官。若世間持此呪文，民間齋講，一日一夜，六時行道，布施精心。有此之處，汝等鬼王助之化愚。致令疾病差愈，勿令百邪干之也。一一如吾言，可得上遷。若不信吾教，汝等頭破作十分矣，不恕之。一一如太上口示律令。

道言：甲午之旬年，多有氏獠羌胡之鬼流行，行萬六千種病，病煞人。中國亂不安，民危溫氣，女人死。鄧艾鬼主與劉斗，來行十二種下土公煞人。神龍上天大水來，五行不運，鬼賊害人，人多暴死，死不以理。自今以去，太上與大魔王卅六王、旬谷等十二鬼主，自今以始，若中國有男女之人家，家有病者，汝助爲却之。令官事散解，人民平安。若一旦不如，汝等先斬，萬碎不恕矣。一一如女青詔書口勅律令。

道言：大運交會，鬼兵縱洩，自今

以去，中國之人，若男若女，疾病弥日，一切惡鬼家神不祐人，山林爲百邪所爲者，一一爲令差愈，勿使枉命也。自今以去，故令枉死妄夭人命者，大魔王及小王王女，一一悉斬首萬段，以謝往愆。如太上口勅，不復恕之矣。一一如鬼法，收付天一北獄，持罪律令。

道言：三界之中，大魔王領卅六天小王，王有卅八萬億小王，王有無數大兵，橫行天下。今與吾共誓，治万姓不得枉濫、妄誅无罪、因人凶衰、爲人作祟也。自今以去，世間有急疾之人，官事危厄之者，一一往視之，助作福力。迴化口舌，國主大臣，一切惡鬼，悉使歡喜。令疾病除差，官事解了，門族和穆，天下安隱，五谷豐熟，君民欣悅，鬼兵自伏，无病无痛，万願從心。如此之者，鬼王等上遷，天人悉喜。若風雨不時，五谷不熟，人民不安，國主暴逆，官事不了，疾病不差者，汝等大魔王、王及夫人、百億鬼王等，悉斬之，一一不恕汝等矣。

洞淵神呪經斬鬼品卷第七

洞淵神呪經卷第八

道言：自今以去，至庚辰之歲，……鬼，鬼名天地，從者三萬人，常行世間，枉煞良善。至壬午年，復有三千九萬頭赤鬼，鬼名大頭，來下煞人。刀兵交會，世間云云，刀……逆賊，六夷死盡，道法與盛，沙門小衰，……人民死矣。欲知度灾，惟有奉受三洞，尊師敬經，天人來護，故得長生，天人來迎之耳。

道言：中國至壬午年，天下悠悠，百姓苦惱。六夷交侵，不安其處。江左士女，奔波四方。蜀漢皓皓，人民頓无。道士入山中，自然令伏習三洞，見其真君，真君不遠，壬辰之間。自今以去，天煞惡人，道士救之，其命乃存。

道言：壬午年，有八萬卑身鬼，鬼名大但，身長三尺六寸，三萬九億人爲侶，手捉赤棒，專行人中，煞其惡人，行九千種病煞人。復有白鳥，鳥如車輪，千萬飛來，入人家中煞人，人不見之。

復有大魚，死於水上，人取食之者便死矣。復有鹿死於野，人取食之者便死矣。道士奉此經，教化天人，勿犯此也。

道言：天下運盡，水來不久，男女之人，无不死矣。惟有奉三洞之人，乃得全耳。自今以去，若有道士救之官事、疾病之處，天人王女卅萬人來下助之，不令有厄也。道士者，勸化人焉。

道言：大劫欲至，人民多愚，不知垂來。道士先見，以有此文。急爲化之，令入三洞。三洞之人，天必來迎之耳。聖人不虛，汝等思之矣。

道言：大劫必至，人民更生，天地造立。道士化人，人不信者，亦如六畜，人煞不知。太上念之，爲其流淚。奈何衆生，累看愚道，不自求出，死矣守迷，天奈之何乎。乃召十方大神約勅，令救衆生，愚人不信，當急化之。道士人開化人，其福无量。道士入山，自靜其志耳。不得化人也，此爲无福矣。

道言：道士欲自度世，當入名山。

欲度一切人者，當在人中化其愚人。愚人無智，見道士則化矣。道士入山，山塗玄高，世人不見，不得化之。雖有本心，無師自度也。是以智人道士，不必山中矣。

道言：自不受三洞之師，不得妄受此神呪經也。何以故。神呪經煞鬼治民，及一切大魔王名字在中。受此經法，別自受受，已各各自一箱中盛之。及人有官事刑獄，疾病久不差，爲作齋一日一夜者，吾當爲汝等召百鬼考問之，令其人病差，乃放之耳。汝等道士，勤化萬民，令受三洞。受經道士治病之處，大王、小鬼王等佐此道士治病。病差者，令汝等上遷，終不負口也。自今以始，與汝大王等，分契爲信矣。

道言：自今甲辰之旬年，有卅六萬黑鬼，行下利赤病，鬼子夜來煞人。六夷之鬼，萬萬爲群，多有女子老人。入宅中取人小口，六畜暴死。國主不恤人民，人民流離他鄉，大臣小吏枉暴下人。當爾之時，鬼兵亂病萬姓。汝

道士等，但爲行道轉經一日一夜。吾當遣三天大兵，兵士三千六萬人，民主人名。十方鬼子問之，爲是何鬼病人也。各自簡擇，令善惡分別。大兵斬之，誅其黨類，斷其種族，不恕之矣。急急如太上口勅律令。

道言：山林之鬼，鬼名江子都，領二千九十万鬼，常行雜死，煞人小口、老人，入人宅中，驚人雞犬、小兒。復有赤情小鬼三萬九千人，仍入人宅中，取人六畜。復有八十万六精蟲鬼，鬼長三尺六分，常持天火火來，燒人宅舍，令人遭官事口舌。復有大運青鬼，鬼長三丈，卅九萬人，手持赤棒，棒煞萬民。有善人信經法者，即不近人也。惡人無義，煞生逆道，不孝父母，道說道士，罵辱師徒者，斬之令死，死入地獄。或令身病，病不差，萬殃并集，苦痛難言，道士不救，救之無益也。

道言：此惡人不敬師父，不尊道法，阿枉道士，屏處罵師，稱其名諱。此人罪牽，乃落赤沙地獄，在地獄中，萬劫不出。出乃爲護田鳥，常在水中

護人頃畝。未死之時，疾病困苦，痛不去身。田蠶不果，所爲不允，人所嗟之。此人悉先世之時，罵辱師徒，罪對之耳。自今以去，若有如此之鬼，大魔王亦嫉之也。若有不敬師徒、不承三洞者，大魔王、小王等通縛，斬之不恕。

道言：汝等道士奉師，當一心念矣。心不政，自作苦本。輕師罵辱，五逆不孝，阿枉百姓，強取人財，教人作惡，言訟煞人。如此輩等，三洞出大魔王、小鬼王等，悉共收之，繫著三天獄中，考其三魂七魄，女子三魂、十四魄，令萬苦俱更，求死不得。汝等道士男女，深自慎之焉。

道言：甲寅之旬年中，有三萬九千人驅煞之。坐不敬師父，枉攬賢人，妄說道士，稱師名道。如此之人，落大驅除、刀兵水之中死也。汝等道士及世間之人，當一心供養師徒，受經三洞，化行一切，療救厄人，有病之家，轉經治之。吾當爲汝等，石十方大鬼、一切諸神問之。若不伏，故令主人之家病死不差，官事不了者，大魔王及小鬼

王，斬汝等之身万段，不恕之矣。一一如太上口勅律令。

道言：道士奉師，當敬師之如天。四時八節，來往候問，問訊安否。世人受事之時，一切如人。自尔不復遵師，師復不往，神不附人。經師爲師，師中最大，師之爲上也。當奉尊之，如父如母矣，不可輕慢者也。天人誅汝，魔王不救，汝等罪人也。一一如太上口勅律令。

道言：道士不尊師，天兵來考，考及孫子，亦入世人鬼輩中耳。庚申、壬午之年，有道士輕師者，鬼兵誅之，卅六万人一時俱死。復有卅九万赤鼻鬼，乙巳之年下來，煞天下惡人卅九万人。至癸巳之年、壬辰之歲，世人多不信道法、不受經誡者，入十八驅除之中，狂死者月有三万九千人。太上亦自分別之耳，若此年天人有疾病，道士救之者生。若治不差，命過零落者，一切大魔王那倫等，身作万段不恕之矣。

道言：男女道士，自今以去，勤化天下愚人，令受三洞大經，人人共受符

錄，身佩名契，貫藉玉曆，師徒相承，不得輕慢也。天人兵誅汝，滅門身死罪謫，悔亦无及也。吾今遣三万六千赤同騎，手捉鐵秘，遊行天下，取无義五逆之人，有病令道士治之耳。若此之人，鬼王不赦矣。何以故，此人欺師罵父之罪，罪及万劫，萬劫不原，鬼王奈何可放之乎。

道言：壬戌、癸亥之年，有八千老鬼煞人。煞人者，坐不供大道也。至癸未、甲辰之年，有十二万人，赤鬼煞之刀兵。亦坐嗟人受道，壞乱人心，打得沙門道士，不肯受經，言道无神，口是心非，誑幻師徒。如此之罪人，令悉入炭火地獄，刀山劍樹，无有出期矣。

道言：己卯、丙寅、丁亥之年，有八千人橫死。坐不遵道法，天租不輸，詭願不還。許而不與，妄祠鬼神。盜取人物，不作福德。不經齋講，雖爲道士，不行香火。不趨人急，急疾民喚，貪作不往，令人怨心。與師作食，不精誠盡意。或有而不出，出而不好。如此等之人，當入大驅水獄之中，万劫不

出。出爲人身，亦不具足，人見不喜，六畜之例耳。鬼王大驅，斬煞一時，魔王等亦不救之矣。

道言：大宗法師，行遊天下，見世人多愚，故設三昧之經。經凡有廿卷矣，此太上之流傳經也。若入山、人間受之，面見太上。然不受神呪，不可入山，不名真道士矣，不得治病也。自今大法師先受此經，此經伏一切大魔王及小鬼王、王及夫人千孫万子，悉助道士化人治病耳。何以故，一切魔王亦與太上併治化万姓故也。世間人智士，一一思吾言矣。

道言：汝等後世之人，自有奉佛及大道者。不得令世俗俗師，百官功坐，打鼓銚鈴，煞猪犬鷄豚，三生水上，名喚祀鬼。此爲乱神，道鬼不聽，家親被繫，謫作三官，考掠万毒，死人不堪，來取生人大小及六畜生口，後致滅門，未復怨道也。

道言：奉道之家，一心專專。凡欲所爲，一當歸道。道士行道，香火万品，由師師解了，方乃外引。百官邪

主，交亂中外，令鬼神育育，心走不定，坐考生人，生人轉惡，家門破滅。悉亦坐此，可不從道士化之焉。

道言：中國人多愚，愚人不見善，見善不識，坐以多死。自今以去，有人受道，世人急疾病之者，迎此法師，一切道士作齋，行禪布施，分壇療救病人。若有刑獄，天遣力士、三天玉女、十方神仙來，合爲護之。助此道士，令此病人速得除差，官事解了，令主人萬願從心。若爾者，上遷汝等萬等千等，不負金口。若復不差，圖勞道士，主人致災禍殃集者，大魔王、王夫人子子及孫、小王、大臣、一切鬼王等，悉斬之不恕矣。

道言：告一切魔王，及今世人有病之者。道士爲治之處，汝等攝天下小鬼王，各各勅之。令助道士治病，悉迴化其主人家親太祖、父母、卅六世以來，悉爲拔之。令主人病差，官事釋散，萬願從心。吾當召百鬼，考問病主人之鬼何人也。一一告下，三官問之，得便和喻令差。不差者，一一收斬之，

不恕矣。告下，急急如太上口勅律令。

道言：自今有病者，吾遣大戟將軍，領赤騎兵卅九億萬人，手持赤棒，專行民間，司取行病小鬼、自稱三公五帝之神，求得便斬之。若有一鬼不去者，三天大魔王、王子孫悉被斬，斬之不恕。汝等自去，若不信吾呪者，汝等頭破作七分矣。

道言：自今以去，中國有一人病者，悉是小鬼、鬼子爲耳。汝等急攝汝下兵，悉令消散，使主人病差。差者，遷汝魔王，令千等萬等。若復不差，令主人厄者，一切內外大鬼，悉當被斬，斬汝不恕也。喙頭魔王、烏延大王、萇鼻大王等，外殍大王、小眼大王、白面大王、赤面大王等卅九萬人，各各當被考，考及汝子孫。汝等急勅小鬼，令主人病差。差者，吾當令汝等上遷也。不差者，玄玄叱，上上烏使然。玄玄叱，一鬼不去者，子等斬矣，子等斬矣。

道言：自今以去，中國有一人疾病，及官事、口舌、刑徒，厄在三囚天地之間，不得自理者，汝等大王，當自力

出之。告下小鬼犯吾民者，急勅汝下兵，速放主人。令疾病苦自差，官事消散，口舌不起。急急如太上口勅律令。

道言：中國有六十九種大鬼，萇須少功，哀圖某川。川有三萬國人，人疾病死。今悉來作耗，耗亂中國之人。令人疾病，一切遇烝，黃奴七子，合來繫人。識汝等小鬼名字，自今以去，斥去千里。急急如律令。

道言：自今以去，三天上至卅六大魔王，悉來下叩頭七十下，求攝下人。一切小鬼，自從太上勅，以不敢復來中國取百姓也。若復有疾病者，魔王等受萬斬矣。

道言：吾良民遊遊，處在中國。中國多愚人，人不信法。今往往一人受道、身佩三洞者，及有人矣病，法師爲其治病者，汝等魔王助道士，令差。令差者，汝等上遷。不差，小鬼來者，汝等斬之不恕矣。

太上說此之時，一切大魔王等，各來下，稽首曰：自今以去，自誓死，不復敢放小鬼也。自今以後，若中

國故復有一人病困者，我曹頭破作卅九分矣。

洞淵神呪經卷第八

洞淵神呪經逐鬼品第九

道言：庚辰、壬午年，必有大……領八万小鬼，手捉赤棒，來入……行卅六種病，腫病煞人。復有憂簡鬼三千九万人，行其赤腫。復有十二万赤目鬼吐下，復有九千万鬼行目痛，復有卅九万鬼行熱病，病煞惡人。當爾之時，得法師經行之處，此鬼等自然自死矣。

三天天女八十万人，與十方綵女卅九万人，一合來下，稽首白太上曰：自今以去，若有病人、官事之處，喚此法師轉經之地，疫鬼欲來不去者，我等自誓逐之，令遠走万里，使主人病差，官事解了。若有不去，九天力士斬之，不恕矣。

道言：今中國人悉不信道，若有一人受經，男女嗟之，道不取愚人之嗟，不名道也，道者貴嗟矣。大水不久，甲申垂近，壬午、癸未，大鳥煞人。天遣疫鬼、炁病、惡人、刀兵交集，人民死。蟲蛇虎狼，水火毒炁，悉能煞人。

人不知之，但自愚心，道說賢人，誹謗道士，毀訾經書，量度聖文。此罪人亦當卒，吐血唯塞，身體浮腫，失音不語，天人誅之，不得久矣。道士自勅，慎口攝心也。

道言：自今壬辰之年，必有真君，真君不遠，號曰李弘。道士信者，牽自勤學，化人受法，仙人來迎耳。壬午之年，疫鬼煞人，人民死盡。太上愍之，遣太真人啓告嚴平、進方、杜周、莊玄、唐君等，中國化之先有仙骨之者，得見此真人也。真人悉皆俗中有子孫氏中國，故太上遣之來耳。

道言：中國之人，至壬午年，必有大災，水火高十万丈。道士入山，入山者全也。壬午年三月至九月，人民死矣。疫鬼三万七千頭，專行煞人。人不信之者，必當先滅。行九十種病，病煞人。真君垂出，惡人不信。天遣煞鬼，來欲誅之。蕩除天地，更造日月，布置星辰，改弦易調，神人法治，仙人爲佐，万劫不死，无有兵刀，地皆七寶，衣食自然，无有六畜，男女悉聖，无有

惡人也。

道言：自今大水來近，人有知者，奉受三洞。男女信法，一心行道之人，我當遣三天玉女十萬人，來下護之耳。道士化之矣，化一人奉者，天人亦善懷一人之心。天人誅汝，汝等先身有骨，骨應上仙，值遇此經，此經玄妙，太上所重也。奉侍供養，置之家中，疫鬼斥去，一切惡鬼不敢近人矣。

道言：自今以去，中國之中若有口舌官事、刑獄囚徒、疾病危厄、死生不別，當急轉此神呪。神呪大經有三萬九億大神，神來救人，万疫自去。十方赤兵、四天大王、魔王綵女，悉下來助，不令有惡也。若道士轉經之處，疫鬼不去者，三天力士斬之，不恕矣。

道言：壬午年以來，人民多病，病鬼交行，千萬爲群，欲煞惡人。若病之時，得法師來救者，我亦遣善人司命卅九億人，來斥却疫鬼，逐之万里。若不者，斬之不恕也。

道言：壬午年有赤烏万頭行，病，病煞惡人，惡人不信，死矣奈何。

真人更立，蕩除天地，疫鬼來煞人。九月十月，人人將食祀五帝，大會一日，東向十六拜，天人必來書子之名，得入玉曆也。癸未年行七十種病，病煞人。若欲求活，家家作飲食祀五帝，南向卅拜，疫鬼自去万里矣。

道言：甲子、甲戌、甲申旬中，有八十萬赤尾鬼，鬼名多阿，一頭三尾，身長九尺，兩手持水，令人寒熱，行九十二種病，病煞人。道士急化，立靜舍於水上道傍，大會一日，醮食祀五帝，司舍西向拜卅六拜，天人必下來書子等之家戶，得入玉名，不在死次，書記天門，司命益算，終不橫死矣。

道言：甲辰之年，必有黑炁，炁病煞人。疫鬼八十九萬人，行喉塞下利病煞人。道士化人，受三洞符錄。正月、二月、三月，水上作大會一日，合集祀五帝，十二拜，神人自然記人名耳。

道言：甲寅之年，必有太恩鬼，鬼長三寸，千千爲群，與赤烏百万，來入人家煞人。人有知者，急自合集，醮食詣水上，一日作會，東向卅六拜，天人

必來記子之名耳。疫鬼自然去，不敢近人也。道士急化人焉。

道言：壬午年所以有灾者，山門欲閉，前三後二也。是以辛巳、壬午、癸未，天有小灾，灾及方伯、三公、二千石，疫鬼流行，行煞惡人，惡人不信者死耳。道士但自化之，天人錄子之名，恒至心矣。

道言：中國之人不信道，故天令疫鬼誅之。自今有識之士信用行者，天人必佐之耳，終不令其枉橫也。智士弘達，行之慎之焉。

道言：自今中國壬午之年，有卅六種草鬼煞人。人有入草中取菜，食其百根莖枝葉，葉中有鬼毒，名生如如，兄弟百万，炁能煞人。病十日一月，入人四支百節身中，當黃赤鬼，長三寸三分也。山中女鬼名羅翁妃女，將廿万女鬼，亦入山林水之邊，每司取人。有此一女鬼名石姜，先有无量功德應仙，坐不敬三天聖人、不奉師三事師教。鬼見道士入山，心生善意，然基刑甚醜，身長一丈，黑面目縱，通身赤

黃，身體臭穢。人不用見脫，復見之者，遠走避之。不敬三事者：一教令受經敬師，不從。二者供養一切道士，未作妬心誹人，不從。三者教令勿與俗人交通，不從。以此三事，天人噴之，今住此山中以來，三千九百億劫，故由不出。道士受三洞之秘，太上真要，將來之基，不用世貴財物、奴婢、宅舍一切榮華也。何以故？世間豪貴一切，時頃耳。不如學仙，萬劫不死矣。

道言：道士受道經，得明師三洞經具者，亦如世之大富人矣。何以故？大富貴之人，田宅無貲，吏兵數百，錢財足手，奴婢供使，天下貧人悉爲已作，從意所用，無有之極，出則乘肥導從，人乞與布施，一一任懷，大富富足故也。大道士內外多知，是物悉學，世間書疏，治病醫藥，針灸鎮厭，觸事皆通。行來人間，萬民使之三洞大經，大經備足，從人取之，亦如大王及大富之人矣。

道言：富貴貧賤一人耳，亦稟一命，何有異也。但自富貴貧賤，先身之

緣。自有先世習道，道未成，故復來此中國，衣食無緣，直自足刑而已。復有先造立大功德，今爲大富貴，富貴流子孫。又得先世應仙不及之，故今大貴也。學道道士，貧而樂道者，此先身習道來久，不用財貨爲故耳。今人大貧困，困至死無有六畜財物者，先身罪人，不作功德，不信經道，六畜中來，或奴婢、生口中來。道士以貴人，天上生來也。自非先身之積善者，終不得作沙門道士矣。

道言：今世多有惡人不信道，往往有受經者，嗟聲盈路。唯有道說道士，誹謗賢人，謂道狂消，入山何爲。或言妖媚，詐作善行，不知一切人命不久保，富貴無常，不可長保。夫少有老，必歸於死，身中三賊，自牽不置。世人不知，貪惜財物，愛樂妻子，寧作罪事，不肯受經，不求仙道，生官自累，終日悠悠。不如學仙，萬劫不死，共天人神仙同遊矣。

道言：壬申之年，多有疫炁，下卅六種病，病煞惡人。唯有受經之人，奉

敬三師，療治萬病者，天人簡之耳。國主有信道者，亦自受三洞，教化下人。當爾之時，六夷疆盛，侵害中國。國主帝王，不恤下民，民招惡從下生，生於大亂。亂於九州，四海育育，無端叙矣。百鬼競來伺人，宜便男女道士一心治之。吾遣十方大驅軍將卅九億人，人領三千六萬人，助道士驅逐之耳。

道言：三界之中國多愚，愚人不信法，是以死入惡鬼中，以此男女大小鬼兵無數也，以其土地罪人多故耳。自今以去，中國之人有一家、二家、三家一時疾病，病危困者，請三洞大法師一日一夜轉經，行九一之道、三五之炁，取十方之位，方方煞之，鬼王亦不敢當汝道士也。吾亦自遣卅萬赤弓大倅、三萬九州力士，來助道士，驅逐一切大鬼、山林邪炁、十方鬼賊，一切斬之耳。大魔王及小王，一一慎吾教，勅下小鬼，令助此道士，治主人病差。有急厄之人，悉令解了。若不如法，魔王威蕤等，悉斬之不恕矣。

道言：此者悉皆天上來耳，人間生者，不必合信也。世人自有卑賤甚陋，心信三洞者，亦天上來下。善人不必好醜，各自有因緣耳。端政者，忍惡中來。大富者，先身布施貧之中來。大貴者，喜爲功德禮拜燒香中來。道士沙門者，積學學問中來。故心慕大化，盡是先身之基耳，今之卒不可得也。道士若志務山藪，不用生官，一切斷緣然入山者，此是去仙近也。如此道士，遊行世間，爲人治病，魔王助之焉。

道言：天下悠悠，不知死日，此是行尸耳。道士求仙，受三洞之要，勸人受之。若入山，人間化一切，愚人貪欲不肯受道，小來死矣。刀兵女與泥同流，万悔無益也。大驅亭至鬼丘，縱不怨也。一一如太上口勅，急急如律令。

道言：自今方有十方惡鬼，赤眉烏然等，卅八万人橫行天下，煞害惡人。有道士男女之官，來救此主人者，小王鬼等，來告大魔，魔王合力士助道士化之，令鬼炁釋解、官事了了。无他

之日，吾等上遷，千等万等，不負口信。若不差者，魔王及小王身斬万段，一一不怨之矣。

洞淵神呪經逐鬼品第九

洞淵神呪經煞鬼放人卷第十

道言：吾昔在在玄都山，爲一切魔王說大驅除經。三天王子，求說上元中元下元大經。復有十國真人，求說三昧无量太素。復有十方仙人，求說導化黃庭。如此諸人，悉來聽經。四方運集閭浮，有三万真人來亦聽經。聽經未竟，各各下坐，曰：中國之人，不解道法，今疫鬼煞之。刀兵暴虐，人民苦惚，門門有死。无有三洞，不自求度。願請此法，流演中國也，惟願天尊垂心遣化。太上曰：善哉善哉。乃遣三万真人，持經化行中國矣。真人尼和將三万九千人，持經布化中國。中國之人，悉各受之。有急病官事之家，悉爲轉之。轉經一宿，官事者解，疾病亦差。若疫鬼懸桓須臾不去者，一一斬煞之，万不有怨也。

道言：此真人等，與中國之人有大經，故遣之令傳經耳。今之受三洞經者，皆悉先身有福緣，應得上仙爾，

得值此師也。自今以去，若有奉受脩佩此經之人，我亦令天人護之，終不令有惡也。

道言：壬午年大兵起動，人民遊遊，六夷不安，疫鬼煞人。可作虎舌餅醢食，三家五家，十家百家，共於大水上，一日大會。作一土壇，土壇縱廣八尺，高六尺，東向卅六，拜祀五帝，乃上書奏告，天必記子之至心矣。

道言：中國辛巳年六月、壬午年九月、癸未年七月，必疫鬼八萬人煞人，人不知自出。鬼名烏塗倫那，倫那長七十丈，千萬爲群。復有赤烏，烏如車輪，飛來食人。人有奉三洞之經、經行人間者，此疫烏塗悉死矣。道士爲信之，信之焉。

道言：大劫垂至，國主貪狼，不恤下民。民人困窮，使役无道。人民苦厄，哭聲盈路，死亡蓋野。男女失時，不遑世好。道法不供，沙門奔亡。六夷云云，大賊縱橫。君臣相位，父子相疑。天遣疫鬼，誅煞此人。此人罪重，生在中國。中國之人，但此大水，水來

不久，不自覺知。法師道士於今有化之處者，三天大王、一切仙人、十方王女，悉來助之。令道士強健，所願從心，所救之家，天人護之，令疾病、官事速得解了，鬼炁消憩，疾病得差。若有一鬼不去，請爲斬煞之，不聽恕也。

道言：十方主者，日來中國。中國之人多惡，惡人多故，信道之希，天人不化。今壬午遣疫鬼八千万，行七十種病，病煞人。人有知者，家家作醢具，於大水上，祀之五帝神，西北向拜卅八拜，乃作大符。符置大門上懸之，疫鬼不敢近人也。自非有符錄之處，不玄此符，此符有八千万大力士守之也。

道言：至甲戌、壬午之年，有八千九万赤面鬼，鬼名明真，各將三万九千小鬼，鬼悉捉赤棒，棒煞惡人。惡人多故，故不信有水，不信有道，當入三塗五厄之中。太上玄見，心念一切，乃爲度之矣。

道言：中國壬午之年，爲一切人作齋，轉无上三洞經，有疫鬼來者，必

不得前也。道士有受三洞布化之人，天帝來助之，終未落惡道矣。

道言：壬午年至甲申，有三千九万黑烏來翔中川，人上放毒，毒入人家，令人炁病，病不可治之。乃有身佩符錄，十家五家，水上作治舍一間，將食祀五帝，乃一日作會。天人必記子之名，名入玉曆耳。

道言：大災垂至，水來不久也。愚人不知，悠悠過日。天帝綵女十二万人，仍來化人，人不知之矣。若辛巳、壬午之年，有值此女來化者，子等即得仙度也。中國若有人疾病、官事、口舌，治師道士但爲救之。綵女等亦來助子，打煞疫鬼，疫鬼自死耳，終不令主人危厄矣。

道言：中國之人至癸未，沙門法衰，道炁日盛，三洞流布，布流四海，九州信樂。道士心改，國主受持。婦女徧信，門門經臺。疫鬼奔走，病者自差，官事散解。三天大丘，擁護法師。法師行處，鬼賊斥去。天人來下，助道士矣。

道言：中國至癸未年以來，沙門

法還西胡國，胡國有佛也，中川秦人正有道耳。道經三洞無數，佛經自去，沙門變白衣人，亦賤之。道士轉貴，貴人亦作道士也。壬午年大龍上天，九萬爲群，人有見者，大水來近也。道士入山，可全金身。中國人多惡，淫佚貪財，生煞无度，凶心不移，不信大道，不作仙行，見人受經，及更笑郊。此人入无盡地獄，地獄之中，一日七死七生，及復令洛。如此卅二劫，劫畢乃出，出得爲人，六情不具，癡聾瘖啞，加復癯頹，盲眼訣脣，缺耳踵留，背折脇屈，唐面跛脚，无手无足。人不喜見，見者欲吐，此之罪人本行所來矣。

道言：善人生樂處，爲人聰明，過目則能。此人先身學問中來，非末世中生也。然道士如此，刑殘之人有心詣道，道烝多弘，當爲度之矣。

道言：如此刑殘之人，先身有大罪，罪故此身。此身復不化者，无有見善緣也。道士但化之，天必記子之心耳。不度者，違前人元元丹懷，亦非大

士度人之法矣。

道言：至壬午，以有三万白頭鬼，鬼名千輪。千輪身長三丈，面黑頭白，万万爲群，下三万九千種病，病煞惡人。惡人有不信道法，說謗道士，平論經書，言是言非，言有言无。不知大道深曠妙遠，若天叵及如海難量。乃以愚人之心，道說妙典。輕道道士，言世无神。心懷兩端，壞乱真心。此之罪人合万死，死入倒立地獄。獄中倒立，立卅六劫。劫盡乃出，出爲六畜復卅年矣。

道言：中國人多惡愚人，是以天令万鬼，惡烝煞之。所以煞之者，由以誹謗道士、煞害良人故也。今有不信大道、不敬三寶、不肯受經者，天兵誅之耳。今有三千六十種病，病煞人有肉鬼三万、石鬼十万、木鬼二万、水鬼三千六十万、土鬼六十万、蟲鬼十六萬，悉能煞人。所以能人煞者，鬼悉附以此物之上煞人。入水水死，入山石死，斬樹木死，食肉烝死，起土土死，入草蟲傷死，此悉非之烝也。道士自今

以去，勸化萬姓愚人，男女令悉奉道。奉道之人，鬼不近人。不者，大驅之日，恐鬼近來誅子耳。

道言：中國之人，壬午之年，有帝主、六夷悉奉大道，三洞流布，入山之入，村村有之。汝等受法奉經，不必大小，不必老少也，亦无男女矣。唯有心奉之者，天人移壽，終不橫死也，自然得入仙品矣。

道言：自今以去，若有道士經行之處，吾當遣九天大兵卅万人、三天力士千萬人，來助道士煞鬼安人耳。太上口與大魔王七十万億人，於大文山之上要曰：自今以去，若有道士男女之官，勸化万民，遊行國界、救療百姓病者，汝等魔王、王夫人子子孫息、小鬼王等，悉共佐化，助道士治救，未令主人病死、枉死，其算命也。

道言：自今以去，方當令一切鬼王，逐道士安人，療治疾病，病无不損。若不損者，斬之万段。吾今放神隊九天大兵卅九万人，一合來下，救道士所治之家，令百病、官事，一切了了。若

不差者，鬼兵先坐。一一如太上生官口所勅，不得違科。急急如律令。

道言：人不信鬼，有不受道，生於世俗，自招罪本，見人作善，笑人行道，不敬三寶，天人誅之，奄然而去，悔亦不及矣。吾今遣十方力士三十萬人，一合逐此道士，所行之處，安人斷邪。若有欺辱道士，罵詈、打慢、圖謀、偷盜者，一一收此人等魂魄，付所近地獄治之。令自知罪負，以明天憲矣。鬼王若用吾言，爲此道士煞戮此惡人等矣。若不煞者，天人不喜，大道不神也。一切魔王曰：唯然。一一奉命令，爲煞如此之人等耳。

道言：自今以去，道士悉行入他國，邊遊處土，求覓病人，一一爲作齋法，轉經行道。吾當遣十方大兵八十八萬人，助子治之。勅一切大魔，令天下无風雨，不淋瀝，人鬼如悅，百姓欣听，國主信道。凡庶受經，經行七日，入山進仙。若不爾者，吾不取名大道也，不復化人矣。

道言：大法師治病，但口章，不必

紙，默招之也，但轉經无不差也。若病大重者，亦可并上口章，仰謝治病，羅縷拔罪捕代耳。道士三洞之師，但入靜關啓，得同志道士行九一之炁，亦行三五之炁，无不降也。此天女之術，天人靈妃，一切天人來助子之心，官事、疾病无不差。自今以去，道士行道之處，大魔王小鬼王等，悉逐佐救之，令差。若不差者，大小王女、大魔王慰真等，頭破作八十分矣。一一如太上口勅，斬之不恕矣。

道言：道士悉奉三洞之人，不得與黃赤道士俱遊也。

道士當入山，不入山者直人間，自別立治舍，與人別床。若欲同之，取求良日，庚申、甲子、丁卯、己卯，八日、十日、廿三日、九日、十八日，合日也，得與善人同會也。道士慎之慎之矣。

道告一切魔王，自今道士住處所、救人之地，當令主人所苦自差，官事解了，人有惡口，一切遏之，百福歸身，安人煞鬼。若此者，當令汝等，上遷萬位，位至飛聖，升入大道。若不佐道

士，令主人死者，汝等各斬之万碎，終不恕之矣。一一奉行，如太上真口所勅，急急如律令。

道言：今有八千黑耳鬼，鬼長六寸，託鳥而飛，來在水中，或因風雨，著人人死。復有三万九千沙鬼，鬼長三寸，其色赤白，亦因水漲便著人。復有八十万大濕鬼，鬼名大頭，其主名奴，各領三万鬼賊，入人宅中，令人失火，火不可救。如此之鬼，大水之運，國主酷治，便來煞人。有受經道士，心務山林，不取生官，如此之人，及黃赤之男女，爾乃不煞耳。

道言：自今方有大鬼，鬼名崩周。十方大鬼，鬼名季子、央兒、桃姜。壬午之年，各領十二万人，來中國煞惡人，惟留真人道士耳。自今以始，甲戌之年以去，万万鬼兵來煞惡人，惡人惡口故。若有道士轉經來救者，天人助之，大鬼王哀爾廬啼自來護之。

道言：自今壬午之年，至壬子、癸丑之歲，大鬼煞人。中國之中，有男女活者，十不有三四耳。惡人多，故天誅

之刀兵水死，奈何奈何。正惟有道士受經之者，天人來迎，大劫將盡，必來速矣。鬼亦競起，人當疫死。若有得三洞法師爲之行道者，大鬼魔王一切護助，令治病家差，爲攝天下橫鬼、内外之殍，入地千刀，治鬼生人。若復不差，主人自今疾病如故，死亡狼藉，官事不了，田蠶不收，仕官不遷，其不如意者，吏兵先坐，大魔王及小鬼子等，斬之千段，万不恕之矣。一一告下，如太上生口所勅，急急如律令。

道言：今有八万九千黑面大鬼，鬼名赤須，身長二丈，卅九万人爲群。每詐稱皇帝，恐人家親，將一切无藉之鬼，世間魍魎，鬼女之殍，頭羅丁勒，南陽葉公，名母犬子，雲中李子徹，三天禁忌之鬼，千千億兆，來入人宅中。取人小口者，老嫗男女，令天下人疾病死亡，村村有之，門門皆死。鬼兵屯聚，集人鄰陌，捉六畜、鳥獸，作其光怪。令人遭官事口舌，刑徒囚獄枉攬，田蠶不收，觸物皆凶。自今以去，汝等魔王小鬼，一切鬼王，急爲道士佐治主人，

令官事解了，疾病者差。若不從命，汝魔王等，各各斬之万段，令頭破千分矣。一一如太上生官口勅，急急如律令。

洞淵神呪經煞鬼放人卷第十

（王育成點校）